

Bosna i Hercegovina  
Federacija BiH  
Kanton Sarajevo  
Skupština Kantona Sarajevo  
n/p gđa Ana Babić, predsjedavajuća

## ZASTUPNIČKA INICIJATIVA


Na 20. Radnoj sjednici Skupštine Kantona Sarajevo, zakazanoj za 18.10.2016. godine, upućujem inicijativu Vladi Kantona Sarajevo da pokrene aktivnosti koje će osigurati pravo prednosti u javnim ustanovama u Kantonu Sarajevo, bez čekanja u redu, za porodice djece i osoba s invaliditetom / poteškoćama u razvoju.

Naime, jedan od mnogobrojnih problema sa kojima se svakodnevno susreću porodice djece s poteškoćama u razvoju je izvršavanje obaveza izvan kuće, a koja uključuju javne ustanove (posjeta doktoru, prikupljanje i ovjeravanje dokumentacije, ovjeravanje zdravstvene knjižice, javljanje na Zavod za zapošljavanje, plaćanje računa itd). Sve ove radnje same po sebi podrazumijevaju duge redove te iziskuju sate odvojenog vremena za iste. Da bi član porodice djeteta s poteškoćama u razvoju obavio nešto od navedenog, neophodno je organizovati pomoć nekog bliskog, da za to vrijeme ostane s djetetom. U težem su položaju porodice koje nemaju ovakvu podršku pa se dešava da su primorani povesti dijete sa sobom. U tom slučaju, dijete s poteškoćama u razvoju, obzirom na posebne potrebe, arhitektonske barijere, gužve i duge redove, dolazi u nepovoljan položaj.

Naravno, ne postoji čarobni štapić koji bi ovim porodicama riješio probleme, ali mali korak ka tome je i ova inicijativa, putem davanja prednosti porodicama djece s poteškoćama u razvoju u javnim ustanovama, tj. posjedovanja odgovarajuće iskaznice /akreditacije kojom bi dokazale potrebu istog i na taj način skraćivanjem vremena potrebnog za izvršavanje neophodnih obaveza. U ambulancama i ostalim javnim ustanovama postoje natpisi po kojim prednost imaju RVI, šehidske porodice, trudnice, pa predlažem da se uz ove grupe istakne i pravo prednosti za porodice djece i osoba s invaliditetom / poteškoćama u razvoju.

Sarajevo, 18.10.2016. godine

Zastupnica u Skupštini Kantona Sarajevo

  
Neira Dizdarević